


Lukasi

Bo Lhaaü Lukasiaa andigkaakhe'
(Sura 5-8)



Lukasi

Bo Lhaaũ Lukasiaa andigkaakhe'
(Sura 5-8)

Injili kama ilivyoandikwa na

Luka

(Sura 5-8)

katika lugha ya Kisandawe

Wycliffe Bible Translators



Pamoja na
Huduma ya Kutafsiri Biblia
na Kuendeleza Lugha ya Kisandawe

S.L.P. 1369

Dodoma

Lukasi

Bo Lhaaũ Lukasiaa andigkaakhe'
(Sura 5-8)

Gospel of Luke

(Chapters 5-8)
in the Sandawe language of Tanzania

Toleo la Kwanza
2016

Mchoro kwenye jalada umechorwa na Kenny Woodrow
© 2013 Wycliffe Bible Translators, Inc.
Mchoraji wa michoro mingine ni Anselmi Dominik Affa, Ilasee.
Imetumika kwa ruhusa.


Ramani © 2016 Wycliffe Bible Translators, Inc.

© 2016 Wycliffe Bible Translators, Inc.

Lukasi

Yesū hewe-x'aaisōso baarasats'isōsoa haqa'ī

5¹ Nqe ts'ekhe, Yesū ^a Genesareti-ziwa-xharāts'a nxumē iē ncomosogkimeea Warangee-bōts'a bokhi'ī. Aa ncomoso deeteesoaa gkudzuma'sets'e ke'egkwesagkimeea'. ² O' bpaā ^b mashua gkisokhia ca'waa ziwā-xharāts'i. Somba-nqa'waisōsosi' mashuādtatchoaa dtū somba-dzagokhē



Mashua

^a **5:1 Genesareti-ziwa.** Xwā heweīā dtē, *Galilaya-ziwa.*

^b **5:2 mashua.** Tcuunxowega' ts'adta were'ī malaambo mee lhak'ee. Ncomoso gkwa'ana au 10a x'oo. Hewets'i megkeēdto me'waaīga' qemewa, ts'adtana' x'agkugkwā ni'ā khwāx'a. Dtets'i teea' siē nxūkeē ni'ā gitl'e meea' hic'aats'e, hia wekēgi' bpaā dtaangkinaa dtula'e.

heso'waĩdtatchea' neē k'atl'a' dtedtegku. ³ Yesū bpaā mashua ts'ekhisudtanaa nxeē nīgā Simonits'a bo mashuasēts'a, bpaā ziwa-xharātchu mashuāsu doolo ts'ādtana q'aa'sugkeesui. Yesū bpaā gkidta'a hagkits'ī ncomoso-gumbēts'a iē somasugku.

⁴ Hia somasugkū q'ookai', bpaā Simonīts'a ikha bo, "Swesi' q'aa'sugkeesugko mashuāsu ts'a cimese'ōna, gkwee sī-dzagokhē x'agkugkuwaā somba nqa'wa."

⁵ Simonī bpaā ikha bogkwee, gkiagka', "Ba'ese, ya'abeyoō nquesugku haa mehēgki q'oowetchū, habpaa bosāts'isi' x'agkugkuwaasi dzagokhē."

⁶ Hia' Yesūgaa bokhi'īkhe'a' ncweei', aa somba uri deetea' nqa'waa bpaā dzagōgkiaa qomsets'i'ōga baaraawa! ⁷ Aa wa'amāso dtē mashuādtasōsots'a' walakhimse, aa ncaadtī adugku'īso. Aa ncaadtia' mashuā gkisokhī tchia' somba' hoqo'waa, gkwaa qubēwasagkimeea ceegkāgkimee.

⁸ Simonī hia hewekhe Yesu-ncwee'ōkhēga ca'waai', bpaā hewe'ōga gkuantumtē ikha bo gkiagka', "Ba'esibpo, tchegkerigko tci'ōbpaā, tci khwalheisi gkoo."

⁹ Simonī ikhi bo'ōts'isi' wa'amāso tchiasokhigki ura' ayee, somba deē hesoaa nqa'waakhēgkimee.

¹⁰ Simoni-wa'amāso somba nqa'wāda mashuāsu dtesūsudtasōso, Yakobō nī Yohana, Zebedayo-nxogkosōgki ayee'.

^a 5:8 Dtorimso hingekhedta ikha' andigkaa gka', Simoni Petro.

Yesū bpaā ikha bogkwee Simonīga, gkiagka',
^a “Meegko ncoo, swe’ōtchesāts’i ncomoso
 kiki’sewabpo.” ¹¹ Simoni nī wa’amāso aa ziwa-
 xharāna’ kwaa. Hia’ heso-mashuakhēga’ ts’ādtatchea’
 dtugkuwaaī’, aa heso-mashuakhē nī magkaāgki tchia’
 bikimaā Yesūga’ x’aa.

Yesū mabuubasea bponaee

¹² Nqe ts’ekhe, Yesū hia mji ts’ekhedtaa iei’,
 ncemesee ts’ekhe gkoose mabuuba dtidtee. Hia
 Yesūga cāgeei’, bpaā gkudtumdtea hoq’ōga q’umanaa
 dzaasugkee Yesū’ōga, nīgā ikha nqwanee, gkiagka’,
 “Ba’esibpo, nqwanesi gkoo bponase. Hii meenaai’,
 korok’osesesats’i daabpo.”

¹³ Yesū bpaā hewe-tl’ūga nqimeē ^b dzaats’ē ikha bo,
 gkiagka’, “Meenaasi, bpoonagkō korok’o!” O’ dtidtee
 mabuubā bpaā tcheegki.

¹⁴ Yesū bpaā ikha bogkwee, “Meegko
 ncemeseegekimee bo, hik’igko dtanā dzikina
 kuhanix’ana, gkoo habpu-korok’o’ō-sadagkā dtugkee
 Musa-sheriaa bokhe’, gkwaa manats’i bpoonai’ōts’i.”

¹⁵ Bpaā tcūsi’, Yesudtanakhē-bō dtaangkinaa ura
 neē ke’ets’iwa. Ncomoso deeteeso aa qwaa
 tchia’dtetchoaā ncadtime ke’egkwesana’, nī heso-

^a **5:10** Qwaā hewets’i Girikigki’i ikha’ andigkaa gka’, *Meegko ncoo, swe’ōtchesāts’i ncomoso nqa’wabpo.*

^b **5:13** Mabuubase dzaats’e’ō bo ts’oo’dtots’e Wayahudi-
 dturudtadta. Dzaats’esē khwalhooa q’oowe.

k'waoo bpona'ĩ'ōgkimeea'. ¹⁶ Hewesi' dtets'i bpakhi qwaa ncomosets'ē'dtenaa hik'i salasanaa.

Yesū qhwadtats'i dtedtegu'ō sambose

¹⁷ Nqe ts'ekhe, Yesū hia iē ncomosoa somasugkui', Farisayōso nī sheria-mwalimūsogki o'a' haanagkī nee. Heso qwaa tchia'dtetchoaa ncaadi Galilayā, Yudeā nī Yerusalemu-mji. Nī Yesū Yakhwe-sambots'a qōts'i k'waoo bponasagkimee. ¹⁸ Hewe'ga' makhaa


ncemesee k'wawesea' dtwarā ncaadi, mogoongoaa khosogkwe ts'adets'a nxinē ie. Aa koodtana nxeesugkeesagkimeea' nī Yesū'ō bpeeso.

¹⁹ Bpaa ncomoso dee'ōgkimee koodtana nxeesats'i daatchoo. Hewe'ga' k'wawesē'ĩga' gkumbuna' gke ni'ā chorōseē hewe-ts'ade'ĩga' Yesū'ōga'

x'agkugkee, ncomosōso koodta neesisōso gkadtea'.

²⁰ Yesū hia heso-aarets'ĩga cāgi', bpaa hewe ncemeseē k'wawesēts'a ikha bo, "Ware, habpu-qhwadtats'ĩ dtedteguwaasī q'ooka."

²¹ Haaso sheria-mwalimūso nī Farisayōso aa xagkats'awats'ia' baaraa, gkia'gka', "Heeusi'na ho? Warangee'ōgea isi lhaa'wats'ea sayo, qhwadtats'i



Gkumbua' chorōseē hewe ts'ade'ĩga' x'agkugkee

dtedtegkusē dte tlaagkigeyooi', Warangee dtidtee dtakhi!"

²² Yesū heso-gkwesegookhē manawaa, hewegkimee bpaā ikha xagkats'a'ī, gkiagka', "Hotcoogkimeena ikhi gkwesega? ²³ Hawē uri moolasē, heeu ncemeseēts'i ikhi bo'ōne, gkisi, Habpu-qhwadtats'ī dtedtegkuwaasi, au ikhi bo'ō, Haangagkō were?

²⁴ Do'ee swe ncwee'ō ncu'waa gkwee manaa, tci Ncemeseē-Nxosi, qhwadtats'i dtedtegku'ō sambosisi'ō q'umadta."

O'si' bpaā hiingo ncemeseē mogoongo khosogkwesēts'a gka', "Nxumegko, habpu-ts'adēgko siē habpu-ts'aana hik'i."

²⁵ O' dtidtee hewe ncemeseē mogoongoaa khosogkweī, bpaā heso tchiaso o' neesisōso'ōga nxume. Bpaā hewe-ts'adēga siē hewe-ts'aanaa hik'i, Warangeets'i halimseseaa. ²⁶ Tchiaso aa ayeē gkwadtiwa, aa Warangeets'a' halimse ikha' bō gkia'gka', "Nqēts'i aarets'isats'i daats'iwaset's'ēgo ca'waa!"

Yesū khwalheia haqaa bpaā hewe-x'aaits'ii

²⁷ Hia hewekheaa yoō c'udtugkuwai', Yesū hia mjīdtatcheaa iē dtui', bpaā kodi-xhēgkuisiōsodtatche ts'ekhea cāgee, xwā heweiā Lawi. Lawī hewe-ya'abo-qwaats'a ie.

Yesū bpaā ikha bogkwee, "X'aasegko!" ²⁸ Bpaā tchiaa bikimaā Yesūga x'aa.

²⁹ Lawī yoo bpaā Yesūga hewe-ts'aanaa gkulalisē mantcha deetee ncuncu'waagkwe.

Kodi-xhēgkuisōso deeteeso nī ncomoso hinsogki mantchādta' nee. ³⁰ Farisayō nī heso-sheria-mwalimūso aa biawasi Yesu-ncwee'ōdtanaēts'a', nī'ā hewe-x'aaisōsots'a' ikha' bo, gkia'gka', "Hotcoogkimee kodi-xhēgkuisōsō nī hinsōso khwalheisōsokhigkisī ts'ekhe'ts'i mantchā nīgē ts'ee?" ³¹ Yesū bpaā ikha bokhi'ī, "Ncomoso ncī lhaasōso wagangats'i dtagkasots'e, haaso k'wauwasisōso dtakhi dtagkaso. ³² Ikhiga' tcigki, ncomoso Warangee'ō lhaaso ncwets'isisōsots'i haqasana citchee. Bpaā tcūsi', haaso khwalheisōsots'i haqasanasi ci, aa heso-qhwadtats'ī manawaā bikimaā piq'iso."

Yesū bo xa'waa khe'waā ci

³³ Ncomosōso heso aa Yesūga' xagkats'aeē, gkia'gka', "Yohana-x'aaisōso mantcha' hok'ots'imsets'ī nī'ā salawa, hakhi Farisayokhi-x'aaisōsogki ikha' ncweewa. Habpu-x'aabpoisōsosi' hosi aa hok'ots'imsets'itchoo, mantcha'ā dtakhi ts'eewa?"

³⁴ Yesū bpaā ikha bokhi'ī, gkiagka', "Hedtegasēgaa x'wegku'īdtosōso'īga iesi', ikhiwa' bosīne gkiegka', meegkwe mantchā nī ts'ee? ³⁵ Bpaā tcūsi' nge ncaadia neē, hedtegasē dtedtegwēeso heso'ō, hiisiisi' x'wegku'īdtosōso mantcha hok'ots'iso."

³⁶ Yesū bpaā adisi dtegia boowekhi'ī, gkiagka', "Ncemesee tlaagki gitl'e xaeetche paando nceē nī gitl'e c'aamuna tiingesē. Hia ikha ncweei', hiingo

gitl'ē xaeē gkoonawaai nī gitl'e-paando xaeēgki lhawegkagkisots'e gitl'e c'aamugki.

³⁷ Haa ncomoso zabibu-k'ame xaeegki gkelemba-bogoloo

tcheegkiwasedtana

hox'owatchoo. Hia ikha

ncweei', zabibu-k'amē tīts'ī

gkelemba-bogolookhē


a'waai gkwaa zabibu-

k'amē ku'ui, nī

bogolookhēgki

gkoonawats'iwai. ³⁸ Zabibu-k'ame xaeē gkelemba-bogoloo xa'waadtana' dtakhi hox'owa.

³⁹ Nī tl'eseēgki, ncemesee zabibu-k'ame nqe deetee bpeedtōts'i ts'eē ya'amesē, zabibu-k'ame xaeēts'i sonaits'e. Ikhi boi, hiingo zabibu-k'ame c'aamūga' lhaaū."



*Gkelemba-bogoloo zabibu-k'ame
gkaawats'ē*

Sabadtogkimee ba'esē


6 ¹ Sabadto-nqe ts'ekhets'i, Yesū bpaa ngano-mindhē'īga iea c'udtugku. Hewe-x'aaisōso ni'siso, aa ngano-tceekhēts'a' lhimbaak'ā ncomē mantcha.

² Farisayōsodtatcho aa ikha' xagkats'a'ī, gkia'gka', "Hotcoogkimee ikhi ncwee Sabadto-nqēts'i? Nqē hewets'i sheria sūgiā x'a'sesūga ya'abo ncwee'ōts'i."

³ Yesū bpaa ikha bokhi'ī, gkiagka', "Sī are Andigkookhēts'i somā cāтчī mfalme Daudiaa ncu'waaits'i ts'oots'isiasi', hewe-wa'amāsokhigki?

⁴ Warangee-koodtanaa nxeē nīgā Warangeegkimee

dtugkuwaadtō mkatēga tl'aā mantcha, nīgā hewe-wa'amāsogkia i'wa'ī, ankaa dtakhi Musa-sheriā ikha bo gka', Mkatē hewekhets'i kuhaniaakhi'a' dtakhi



Warangeegkimee
dtugkuwaadtō mkatē

mantcha.”

⁵ Yesū bpaā ikha dtoots'ugkuwaā boowe, “Tci Ncemesee-Nxosi, Sabadto-nqegkimee ba'esisīsga'.”

Yesū Sabadto-nqēts'a ncemeseeā bponaee

⁶ Sabadto-nqe dtets'i, Yesū bpaā sinagogidtanāā nxeē iē ncomosoa somasugku. Gkidta' ncemesee ts'ekhe gkoose tl'ū lhaaū q'awegkwese. ⁷ Sheriamwalimūso nī Farisayōso nee'ā c'ee Yesū ncemesee Sabadto-nqēts'i bponaeeine'ōts'a'. Hia bponaeei', aa sayo-ncwee'waix'ana qeme'ī bo q'ooweso.

⁸ Yesūsi' bpaā heso-gkwesegoōga manawaa. Hewegkimee bpaā haau ncemesēē tl'ūgaa q'awegkweiāts'a gka', “Haangagkō cī o gkadte nxume.” Hewe ncemesēē bpaā hik'ia ncomoso gkadtea nxume.

⁹ Hewe'gaa Yesū heso'dtenāā k'eets'ī ikha bokhi'ī, “Xagkats'asīge', Musa-sheriā higkia bokhisū gka', hotcoo ncweesū Sabadto-nqēts'i? Lhaa'wa ncwee'ō au khawase ncwee'ō? Dturudta bpona'waa'ō au k'wee'ō?” ¹⁰ Yesū bpaā tchiaso o' neesisōsoa ca'waa'īgoō, bpaā haau tl'ūgaa q'awegkweiāts'a ikha

bo, gka', "Nqimeegko habpu-tl'ũ." Bpaa nqimee, hewe-tl'ũ gkwaa dtelhaa lhawe.

¹¹ Haaso ba'ewasisōsosi' aa ura' k'itl'ewa, aa dtidtitchoaa qhwēgki higkikhe' Yesū ncu'waaso'ōts'a'.

Yesū 12soa malhe'ĩ kisimsoogkimeea

¹² Nqekhē hewekhedta, Yesū bpaā gawadtanaa hik'i salasanaa, bpaā xo'a Warangeets'a nqwaneyoō nqesugku. ¹³ Hia nqei', bpaā hewe-x'aaisōsoa haqa'ĩ nĩ hesodtatcho 12soa malhe'ĩ nĩgā hesots'i ikha haqa gka' mitume. Heso malhe'ĩdtosōso-xwakhē, ¹⁴ Simoni, Yesuaa xwā dtē ieeā gka' Petro, nĩ hewe-toots'eē Andreā. Hinsōsogki Yakobō, Yohanā, Filipō, Batolomē, ¹⁵ Mateĩ, Tomasĩ, Yakobo Alifayo-nxowē, Simoni ^aZelotea' haqats'ē, ¹⁶ Yuda Yakobo-nxowē nĩ Yuda Iskariotĩ, heeu hewega' yoō Yesū khawasiso-tl'ūdtana bpeesē.

Yesū deetesoa bpona'ĩ

¹⁷ Yesū bpaā hewe-x'aaisōso'ĩga gawadtatcheaa x'agki. Bpaā qwaa nxinesets'a nxume. O' hewe-x'aaisōso deetesoa kikiāgki nĩ ncomoso-gumbe mee, Yudea-qwaakhē tchia nĩ Yerusalemu-mji'dtetchoaa ncadi. Nĩ tl'eseēgki ncomoso qwaaqwaa bahari-xharāts'i mjikhē Tirō nĩ

^a **6:15 Zelote.** Zelotē ncomoso-gumbē-xwaga', Israeli-boyoboyo-gumbē meenasisōso nĩ ura' sona heso-ba'ewasisōso, Warumitl'ūdtatcho dtu'ōts'i. Hewe ncu'waasagkimee tleesisoa nee x'āgki'ĩgkiwa'.

Sidonitchogki ncaadia'. ¹⁸ Ncomosōso heso Yesūts'i ke'egkwesana' o'na ncaadi nī heso-k'waookhēgki bpona'waakhi'īgi. Haaso malaigka khawaseaa sogkona'īsōsogki bpona'īga. ¹⁹ Ncomoso tchiaso Yesū dzaats'e'ōts'a' sona, samboaa hewex'a'tcheaa dtū nīgā tchiasots'a bpona'ōgkimee.

Mamaasesisōso nī mamaasets'esisōso

²⁰ Yesū bpaā hewe-x'aaisōsoa ca'wa'īgoō gkiagka',
 "Mamaase mutugusīsī,
 sī Warangee-ba'oo-ncomososī'ōgkimee.

²¹ Mamaase sī swe ts'oots'iwasisīsī,
 x'andtamesī'ōgkimee.

Mamaase sī swe k'eesīsīsī,
 magkats'ī'ī nqeesī'ōgkimee.

²² Mamaase sī hia' ncomosoa nqa'tchī
 nī'ā pank'esī hamamesīgi'
 nī sī-xwākhēts'a' gkoona
 tci Ncemesee-Nxosīsie x'aase'ōgkimee.

²³ Hia hewekhe tchiaa cāts'iwai', meenats'ī'īgkwe
 ts'ongorits'ongori, dtelha dtakhi sī-zawadī tl'unguts'i
 bpeekhisīdtō ura ba'e'ōgkimee. Heso-gkogkokhīsogki
 udtaa ikha' Warangee-xumaisōso khawateea'
 ncuncu'waats'ī'ī.

²⁴ Bpaā tcūsi' sīna cāsī benegeesīsī,
 sī-magkats'ī q'oowē tlemse'ōgkimee.

²⁵ Sīna cāsī swe x'andtamesīsīsī,
 ts'oots'iwasisī'ōgkimee.

Sīna cāsī swe magkats'isisīsī,
 hirira'ī k'eesī'ōgkimee.

²⁶ Sīna cāsī sī ncomoso tchiasoaa halisesīsīsī,
heso-gkogkokhīsogki udtaa ikha' faroo-
xuma'waina ncwee'ōgkimee.

Sīgkimee khawasisōsogkwe meena'ī

²⁷ Bokhisīsi sī neē ke'ekhisesīsīsī, sīgkimee
khawasīsōsogkwe meena'ī. Lhaa'wagkwe ncwee
nqa'tchīsīsōso c'aangkina. ²⁸ Sīts'i tchogusīsōso
c'aangkina lhaa'wagkwe bo. Warangeets'igkwe
lhaa'wa nqwanekhi'ī haaso sīna khawase
ncweesisōso. ²⁹ Ncemesee hia tl'eebpo gkamagku
kaakhibpo'īgai', dtē gkamagkūgkigko piq'iseegkwe
bpaā kaakhibpo. Ncemesee hia habpu-kodtīga
sie'bpoi', meegko x'a'see habpu-shadtī sie'ōts'igki.

³⁰ Habputs'i magkaa nqwaneseē ieegko. Hia
ncemeseeaa habpu-magkaa bpobpōgi', meegko
bogkwee kwamseekhibpo'ōts'i. ³¹ Hinsonagkwe
lhaa'wa ncwee, sīgaa lhaa'wa ncuncu'waa'tchīge
sonakhe'.

³² Hie dtakhi sī meenasīsīsōso dtitchoe meena'īgi',
halimso q'oowesats'i lhawegkaatchī. Haaso
khwalheisōsogki heso meena'īsīsōsoa' meena'īwa.

³³ Sīgki hie dtakhi sīna lhaa'wa ncweesisōsonae
lhaa'wae ncwee', araane halimso q'oowesats'i
lhawegkaae? Khwalheisōsogki ikha'
ncweegkwāgkiwa. ³⁴ Tl'eseēgki, hie kobpasugku'ī
haaso sīgaa mana'ī gka' kwamseekhisīsoi', araane
halimso q'oowesats'i lhawegkaae? Haaso
khwalheisōsogki heso-wa'amāsots'a' kobpasugkuwa,

ikha' manaã gka' hewekhe kobpawaadtõ tchia kwamseekhi'iso.

³⁵ Bpaa sîsi', sîgkimee khawasîsôsogkwe meena'î, nigkwê lhaa'wa ncweekhi'î. Kobpasugkugkwe mee kwamseekhisî'õts'i gkwesegã sîgaa kobpasugku'îkhêts'i. Hie ikhe ncweei', zawadi mee q'oowesî, nî sî Warangee Tchiana Ba'esê-nxogkots'isî, Warangee ncomoso hewets'i hinamsewasets'ekhê nî ncomoso khawateekhêts'i adugkuwaa'õgkimee. ³⁶ Ikhigkwe moo lhauwa sî-Dtadtãgaa mooa lhawekhe'.

Hinsots'i xhêgku'õdtanaëts'i somasugku'õ

³⁷ Meegkwe hinso c'aangkina xhêgku dtugku, gkwee mee xhêgku q'oowe. Meegkwe hinsots'i gkiegka' khawa'a, bpaa mee Warangeeaa sîgki khawasisî cãsî. Sîna qhwadtats'isisõsona meegkwe qhwadtats'i dteekhi'î, sîgki Warangee sî-qhwadtats'î dtedtegkuwaakhisîgi. ³⁸ Hinsots'igkwe magkaa i'wa moo'î, sîgki q'oo'waasî. Warangee deetee sîgei, ncomosoaa c'wãga' si'wakhe' terea' hoqõ sukhê gkwaa poot'okhe'. Sîgaa hoqõ nî sî-wa'amats'e i'wakhe', Warangee sîts'igki ikhi si'wai gkwee."

³⁹ Tl'eseëgki bpaa adisia boowekhi'î gka', "C'eesets'ëwa'na wa'amee c'eesets'ë kheesats'i daaine? Heso tchiaso q'wadtana tl'atasots'e?

⁴⁰ Ncomoso somasugkuts'esõso heso-mwalimũ remaasots'e, bpaa tcûsi' hia' yoõ somoõga' dtoo', tchiaso heso-mwalimũ lhak'ewaso.

⁴¹ Hotcoogkimeei habpu-wa'amee-cweedtaē k'atl'ā ts'oo'dtōts'i c'ee, habpu-cweedtaē hubeē cābpoos'i?

⁴² Habpu wa'ameets'iwa' higki bobpo gkiigka', Xo'ee cweedta k'atl'a dtedtegkwee'bpo, ondte habpu-cweedta hubeesi'? Habpu gkinambiribpo! Habpu-cweedtaē hubeēgko dtanā dtedtegkwee, hiisiisi' habpu-wa'amee-cweedtaē k'atl'ā ts'oo'dtō lhaa cābpo dtedtegkwee'ō.

Ncomoso heso-ncwee'ōkhē'īga' manats'i

⁴³ Tee lhaau k'o khawatee nciasē tlaagki, hakhi tee khasēgki k'o lhaau nciaits'e. ⁴⁴ Tee tchia hewe-k'o'īga manats'iwa. Ikha manats'i ncomoso tini dtweewatchoo degeradta haa zabibugki ncwee-teedta dtweewatchoo. ⁴⁵ Nī ncemesee moo lhaaū hewe-moodta lhaa'wādtatchēts'a dtugku, hakhi ncemesee moo khasēgki hewe-moodta khawasēdtatchēts'a dtugku. Magkawa' ncemesee hia sayoi', hewe-moodta qōts'iwasekhēts'a sayo.

Tlinei marasē nī tlinei marasets'ē

⁴⁶ Hotcoogkimee tcits'i haqa gkiegka', Ba'esibpo, Ba'esibpo, ondte tcaa bowats'ēts'isi' ncweetchī?

⁴⁷ Ncemesee tcix'ana cī tci-bo ke'ē ncweesē, adisi dtugkeesi higki lhak'ee'ōts'i. ⁴⁸ ^a Hewe ncemesee koo-

^a **6:48** Qwaā hewets'i Girikigi'ī ikha' andigkaa gka', Hewe ncemesee koo-tlinei lhak'ee, dtwayoō dīna dtugkeē nī hewena koo tliingesē. Tl'wā meeaa x'oosi', gkwaa nqwaā pootl'ō koōga kundee, bpaā tcūsi' q'awetchee, dīnaa tliinge'ōgkimee.

tlinei lhak'ee, q'uma lhaau itchawaã q'eets'i koo tliingesē. Tl'wã meeaa x'oosi', gkwaa nqwaa pootl'õ koõga kundee, bpaã tcūsi' q'awetchee, q'eets'a tliinge'õgkimee. ⁴⁹ ^a Haau tci-bo ke'ē ncweetcheēsi', hewe ncemeseē koo masangaa dtidteedta tliingesē lhak'ee, q'ee itchawaatcheē. Tl'wã meeaa x'oosi', gkwaa nqwaa pootl'õ koõga kundee, gkwaa q'awē nī dtelhaa gkoonawats'i.”

Israeli-nxaeets'e-aarets'ī ba'eteē

7 ¹ Yesū hia ncomosogkimeea bokhē hewekhe tchiaa bo'waã q'ookai', bpaã hik'ia Kapernaumu-mjiddanaa nxee. ² Xo' mjī hewedta asgkarigkimee ba'ese gkoose, Rumi-ncemesee. Hewe asgkarigkimee ba'esē pagadzieese nī ura meenaa hewe. Pagadzieē ura k'wawe, tlaasisagkimeea.

³ Haau asgkarigkimee ba'esē hia Yesu-gkumāts'a ke'ei', bpaã Wayahudi-di'seedtatchea kisimsimaa Yesūx'anaa, aa nqwaneeso bpaã cī hewe-pagadzieē bponaei. ⁴ Haaso di'seēso hia' Yesu'õga' nxeei', aa ura' nqwanee, gkia'gka', “Hewe ncemeseē lhawegkaa bõ heeu ncu'waats'esats'i, ⁵ sū Wayahudisūsūga meenasū'õgkimee, nī tl'eseēgki heweeaa sinagogia tliingekhisū.”

⁶ Hewe'gaa Yesū hesokhigkiaa haangā asgkarigkimee ba'ese-koo'õna' nī. Hia' koo'õga'

^a **6:49** Qwaã hewets'i Girikigi'ī ikha' andigkaa gka', Haau tci-bo ke'ē ncweetcheēsi', hewe ncemeseē koo masangaa dtidteedta tliingesē lhak'ee, dtwaatcheē dī q'oowesagkimeēts'i.

beebasii', asgkarigkimee ba'esē bpaa hewe-
 maamaakhia kinse'ĩ, aa Yesūga' bogkwee, gka',
 "Ba'esibpo, meegko iē mak'e, tci lhawegkaatchee
 habpu tci-koodtana nxee'ōts'i gkoo. ⁷ Nĩ
 hewegkimeesi ikhisi cā habpux'ana cisats'igki
 lhawegkaatchee. Bogko dtakhi boowe, tci-pagadzieē
 lhawei. ⁸ C'eegkwaa tci-ya'abodtagki, tci'ōtche
 ba'ewase neese nĩ asgkari hingegki neese tci
 cugkukhē. Hisi asgkarits'isi gkisi, Hik'igkoi', bpakhi
 hik'i, hisi dtets'isi gkisi, Cigkoi', bpakhi ci. Nĩ tci-
 pagadzieets'i hisi gkisi, Heeuts'igko ncweei', bpakhi
 ncwee."

⁹ Yesū hia ikha ke'ei', bpaa ura ayeere, bpaa haaso
 ncomosōso deetesōso hewe x'aasisōsonaa k'eets'ĩ
 ikha bokhi'ĩ, gkiagka', "Bokhisĩsi gkisi, ncemesee
 heeukhe' aarets'isē cāsisits'e Israeli-nxagko
 tchiadtagki!"

¹⁰ Haaso Yesux'ana kinse'ĩdtosōso hia' kwaai', aa
 haau pagadzieē lhawē tlemsesea' q'oowe.

Yesū mehembesu-nxowe tlaasisea c'ekwee

¹¹ O'tchesāts'i, Yesū bpaa Naini-mjiddtanaa hik'i.
 Hewe-x'aaisōso nĩ ncomoso-gumbe ba'etee
 hewekhigkiaa x'aagki. ¹² Hia mji-dtanga'ōga beebasii',
 bpaa ncomosoa q'oo'waa mjiddtatchoaa k'aree-
 miimba' dtwarā neē ni'. Tlaasisē ncemesu
 mehembesu-nxowe, k'areēgki hewe dtidtee.
 Ncemesūsu hesu ncomoso-gumbe ba'eteekhigkiaa
 neē ni', hewe-mjiddtasōso.



K'aree-miimba' dtwarā neē ni'

¹³ Yesu hia mehembesūsua cāsui', bpaā moogkumua cāgkwesu, bpaā ikha bogkweesu, "Meegko k'ee."

¹⁴ Hewe'gaa miimba'ōnaa q'aa'ā, ts'adē hesoaa dtwara'īga dzaats'ee. Haaso miimbāts'i dtwarasisōso aa lhee. Yesu bpaā ikha bo, gkiagka', "K'areebpo! Bokhibposi gkisi, haangagko!" ¹⁵ Hiingo tcheets'isē bpaā ts'ekhenasāts'a gkongo'ō haagkits'ī sayoa baaraa. Yesū bpaā k'areēga mesūsua iee.

¹⁶ Aa ncomoso tchiasoaa ncoō Warangeets'i halimsoa' baaraa, ikha' bō gkia'gka', "Warangee-xumai ba'eseaa sūdtaa cāts'i. Warangeē cia hewencomosokhēts'i adugkusanaa." ¹⁷ Bokhē heekhwe Yesuaa ncweewats'ekhē, gkwaa Yudea-qwaakhē tchiadtaa ke'ets'iwa nī qwaā tchia xo' beebakhēts'igki.

Yesū meenaa gka' hewega' Masiyā

¹⁸ Yohana Badtizaiā-x'aaisōso, aa Yesuaa ncweewats'ekhē tchia' Yohanāgkimeea' bo'waagkwe. Hewe'gaa hesodtatcho gkisosoa haqa'ī, ¹⁹ nīgā

Yesūx'anaa kinse'ĩ aa xagkats'aeeso, gka', "Habpune Masiya, hiingo ciibpõbpo, khare dtets'o' dara?"

²⁰ Makhāso heso gkisosōso hia' Yesū'õga' nxeei', aa ikha' bo, "Yohana Badtizaiāgaa habpux'anaa kinsesū, oo xagkats'abposū, gka', Habpune Masiya, hiingo ciibpõbpo, khare dtets'o' dara?"

²¹ Yesū hiisii ncomoso deetesots'a iē bpona, k'waoo humaahumaawasisōso nī malaigka khawateewasekhē. Nī tl'eseēgki c'eewasets'e deetesoa adugku'ĩ aa c'ee.

²² Hewe'gaa Yesū ikha bokhi'ĩ, gkiagka', "Ni'gkwē tchia bo'waagkwe Yohanā, sīgaa ca'wāā ke'ewats'ekhē, ^a hingo c'eewasets'ē c'eewaa, werewasets'ē werewaa, mabuubawasē bpoonawaā korok'owa, ke'ewasets'ekhē ke'ewaa, lha'dtewasē c'eewaa lha'dtewasēdtatche nī mutugukhēgki Bo Lhaaūts'a ke'ewa. ²³ Mamaase ncemesee tcina gkwadtisaset's'ē."

²⁴ Yohana-x'aaisōso hia' o'tchoaa tchegkerii', Yesū bpaa ncomoso-gumbē ba'eteēgkimeea Yohanadtanaēts'a bokhi'ĩ, gkiagka', "Are hie q'uma khateē lhubasets'ēdtana Yohana cāsanae ni'i, higki lhak'ee ncemesee cāsanae ni'? Ncemesee tchia xoo'dtenaē cāsanae ni' haau wekēgaa lhubpaa wisiwisiseeākke'? A'a! ²⁵ Hia ikhits'e'i, hotcoo cāsanae ni'? Ncemesee ba'ese gitl'e hogoriwasitee

^a 7:22 Ya'abokhē Yesuaa heeu mstarīdtaa bowats'ekhē hewekhega', Warangee-xumai Isayaa bowats'ekhē gka', Masiyā (Kristū) hia cii' hewekhets'i ncweei. C'eegko Isaya 26:19, 29:18-19, 35:5-6, 61:1.

hic'asē cāsananee ni'? A'a! Ncomoso gitl'e hogoriwasitee hic'ā nī hesoaa meenaakhe' neewasisōso, falmegki'ĩ koodta' neewa. ²⁶ Swesi' hotcoo cāsanae ni'? Warangee-xumai cāsananee ni'? Ikhiga' isi! Nī tcūgki hewe uri mee Warangee-xumai'ōtche. ²⁷ Heeu hewega' Warangeeaa hewe c'aangkinaa Andigkoodtaa bots'ē gka',

[†] C'eegkwaa, kinseesi tci-kisimso-ncemeseesi, habpu dtaangki hik'ĩ xoo ncu'waakhibpoiā."

²⁸ Yesū bpaā dtoots'ugkuwā gka', "Bokhisīsi gkisi, ncomoso tchiadta swenagki Yohana'ōtche meē tlaagki. Gkwaa ikhigkisi', Warangee-ba'oodta uri ts'oo'dtōsi', mee Yohanā'ōtche!"

²⁹ Ncomoso tchiaso nī kodi-xhēgkuisōsogki hia' hewekhe bōts'a' ke'ei', aa Warangee-ya'abō lhaau'ōga' meenaa, ncomosōso hesoga' Yohanaa ^abadtiza'īsōso. ³⁰ Bpaā tcūsi', Farisayōsō nī sheriamwalimūsosi' isia' Warangeeaa hesonaa gkwesegawaakhēts'a' Yohana badtiza'ī'ōts'i isī'īga'.

³¹ Yesū bpaā ikha iea bo, gkiagka', "Hotcoona anolosina nqekhēdta ncomosōts'i? Hotcoo ncomosona heeu lhak'āsi'? ³² Nxoogko-gumbe

[†] **7:27** Malaki 3:1

^a **7:29** *badtizoo*. Ncomoso Yohanaa bowats'ekhē meenawaasisōsots'i ts'adtanaa qubemse. Ncwee'ō heeu ikha ladi'me hingo ncemeseē badtizaadtō hewe-qhwadtats'īga manawaā bikimaā piq'i. Uri badtizoodtanaēts'i manaasagkimee, Bo maanekhi nqank'owasē-gkitabūdtagko c'ee.

sogkots'i kikiāgkī neē kongomawāgkiwasē lhak'a,
gka',

Chimekhisīgō gomaō nqamekhisī
haa x'iatchī.

Hirira-chimeo chimekhisī
hakhi k'eetchī.

³³ Sīgki heso lhak'asī, tchiats'ie isi. Yohana
Badtizaiāgaa ^a mantchaa hok'ots'imsets'ī nī zabibu-
k'amegki khooseesets'e'ōgkimee hewe-dturudtadta,
sī bpee gkiegka', Malaigka khateese! ³⁴ Tci
Ncemesee-Nxosīsisi', sii mantchaa ts'ee, bpee
gkiegka', C'eegkwera heeuts'i, mantcha khatee nī
k'ame-ncemesee, kodi-xhēgkuisisōsō nī khwalhe'wai-
maamaa. ³⁵ Bpaa ikhigkisi', Warangee-gkwesegoōsi'
aareyee nī tchiaso heeu meenasisōsogkimee
hembets'a manats'i."

Yesū ncemesu-qhwadtats'a dtedteguwaa

³⁶ Farisayoeē ts'ekhe gkoose, bpaa Yesūga
mantchanaa gkulalisee hewe-ts'aanaa. Yesū bpaa
koonaa nxee mantchānaa.

³⁷ Nī mjī hewedta tametchu gkoosusu, ikhisa
manats'i khwalheisu. Hisa ke'e gka' Yesū Farisayoeē-
koo'ōga iē mantchai', saa ^b tchubpa hogorisiteesa sie
tchā lhaa himeteesēsa, nisā hik'ī o'sa nxee. ³⁸ Saa

^a **7:33** Mantchā nī ts'eewats'e Wayahudidta nqetchiakhē mkatē nī
zabibu-k'ame. Bpaa tcūsi' Yohanāsi' x'a'sets'a hewekhets'i.

^b **7:37 tchubpa hogorisitee.** Tchubpā heeu alabasta'īga ncu'waa.
Alabastā dī gkalee poo, uri hogorisitee.

Yesū nqā'dtesa nxume, hewe-xhadtakhē'ōsa nisā k'ee, gkwaa hesu-tchaakhēgaa Yesu-xhadtakhēnaa neē dtoodtoowa. Ncemesūsu hesu saa hesu-tceets'ē'isa Yesu-xhadtakhēts'isa iea hama, ondte hewe-xhadtakhēts'isa iē humbā nisā haau tchā lhaa himeteēts'isa hinxigkwe.



K'aree-miimba' dtwarā neē ni'

³⁹ Hiingo Farisayoeē Yesu mantchana gkulaliseesē hia ncwencwets'isēga ca'waa', bpaa dzigidadtanaa gkwesega, gkiagka', "Heeu ncemesē Warangee-xumaits'e. A'ee Warangee-xumaiwa', manaai heesu ncemesūsu iē hewena dzaadzaasusūsu khwalheisu'ō nī meenaagkweits'e ikhi ncwee'ō."

⁴⁰ Hewe'gaa Yesū ikha bogkwee, gkiagka', "Simoni, bo gkoose tcix'a' habpuna bots'ē." Simonī bpaa gka', "Bokhisegko mwalimu."

Yesū bpaa ikha bo, ⁴¹ "Ncomoso gkisosso neesiso aa peesaa' kobpawaa ncemesee'x'a'a'. Ts'ekhē dinari 500a kobpawaa nī dtēgki dinari 50a kobpawaa.

⁴² Heeso tchiaso hia' dage xheme'ōts'a' remats'ii',

ncemeseē hewe bpaā dagēga bikimaakhi'ī, aa mee xheme. Swena, lheewa' hesodtatche hawē kobpasugku'īsē uri meenaai?"

⁴³ Simonī bpaā ikha bo, "Tci hisi c'eei', haau dage ba'etee bikeegkwedtō uri meenaai." Yesū bpaā ikha bogkwee, "Lhaai boowe."

⁴⁴ Hewe'gaa ncemesūsunaa k'eets'ī Simonīts'a ikha bo, "Heesu ncemesūsu cāsuts'enii? Habpu-koonasi nxeesi' ts'agki seebpoo ^axhadta nxokosagkimee. Heesusi' tci-xhadtakhē hesu-tchaa'īsa nxokowaakhise nisā hesu-tcee-ts'e'īsa hamawaakhise. ⁴⁵ Habpaa mogkolasi'gki, humboo'ī mogkolasebpoo. Heesu ncemesūsusi' tci ona nxeesāts'i, tci-xhadtakhēts'i iē humbasats'i ma'tchuu.

⁴⁶ Tci-tceē tchā nximeekhisebpoo ba'esisi cāsē sūgaa ncweewakhe'. Heesu ncemesūsusi' tchā lhaa himesesa nxi'waakhise tci-xhadtakhēgkisa.

⁴⁷ Hewe'gasi ikhisi bokhibpo, gkisi, hesu-qhwadtats'ī deeteekhē dtedteguwaasī q'ooka, saa urīsa meenase. Bpaā tcūsi' qhwadtats'i maa'dto dtedteguwaagkwedtō, meena'ō ts'oo'dtose."

⁴⁸ Hewe'gaa Yesū ikha bo hesu ncemesūsuts'a, gka', "Habpu-qhwadtats'ikhē dtedteguwaasī q'ooka."

⁴⁹ Hewe'ga' waginīso hinsōso hewekhigki o' neē mantchasisōso xagkats'awāgkia' baaraa, "Heeusi'na ho are, bpaā qhwadtats'igki dtedtegu?"

^a **7:44 xhadta nxoko'ō.** Wayahudīso ikha' ncweewa, hia wagineaa ci' aa ts'a'a iee xhadta nxokosagkimeea', xookhē tl'aranguwase'ōgkimee au noma baridta.

⁵⁰ Yesū bpaa ncemesusūts'a ikha bo, gka', "Habpu-aarets'īgaa bponabpo, putl'umagko hik'i."

Tametchīso Yesu x'aasisōso

8 ¹ Hia hewekheaa c'udtugkuwai', Yesū bpaa mjikhē nī gkidzidzikhēdtaa ringooringoō nīgā bo lhaaū Warangee-ba'ooiāts'a ncomosogkimeea bō ma'e. Nī haaso 12sōso hewekhigkiaa x'aagki. ² Nī tl'eseēgki tametchi hinso heweea malaigka khawateea ts'ok'imseets'i'īsōsō nī k'waooa bpona'īsōso, hewekhigkiaa x'aagki. Hesodtatcho, Maria Magdala-gkidzidzits'isūsu, malaigka khawatee 7aa dtudtuts'eesūsu, ³ nī Yoana, Kuza-ncumusūsu. Kuzā mfalme Herode-koo'ō pagadzi tchiasogkimee ba'esē. Dtesūsugki Susana nī hinsogki deeteeso. Tametchīso heso, heso-magkaakhē'īga' Yesū nī hewe-xaaisōsots'a' adugku.

Q'uma-gkalee humaahumaana adisi

⁴ Nqe ts'ekhe, ncomoso-gumbe uri meeaa mji deeteedtatchoaa Yesux'ana' ncaadi. Yesū bpaa q'uma humaahumaanaa adisia boowe, gka', ⁵ "Boyo-xai ts'ekheaa hewe-boyokhēts'i xasanaa hik'i mindadtanaa. Hia boyokhēts'a ncīkhō ma'ei', boyo hingekhe gkwaa xoonaa qhoo, aa xoo'ī c'udtugkuisoaa tl'inkimaa, aa twiigkiaa mantchawaa. ⁶ Boyō



Boyo-xaiaa boyoa ncīkhō ma'e

hingekhe gkwaa q'uma gkidtedte dīsēnaa qhoo. Hia dtudtui' gkwaa ncink'ewa hats'a k'waamaa'ōgkimeea.

⁷ Boyō hingekhe ncweedtanaa qhoo. Hia dtudtū neē xanawa ncweekhigkiaa ts'ekhets'ai', gkwaa ncweeteēgaa tl'iba'maa hewegkimee haa xanawatchee.

⁸ Boyō hingekhe gkwaa q'uma lhaaunaa qhoo. Hewekhe hia dtudtui' gkwaa xanawā 100wanaa x'inewa boyō xa'waadtōtche."

Yesū hia hewekhea bo'waā q'ookai', bpaā rōga c'āgkweē gka', "Gkegkewasē, ke'egkwa!"

Yesū q'uma-gkalee humaahumaa-adisīga hembets'a bpee

⁹ Hewe-x'aaisōso aa xagkats'aee heeu adisī hewea bokhi'īdtanaēts'a'. ¹⁰ Yesū bpaā ikha bokhi'ī, "Sī Warangeeaa daasugkusī, Warangee-ba'oo-bō xwaxwats'iwasekhē manawaa'ōts'i. Bpaā hinsogkimeesi' adisi'īsi bo, † anka c'eegkee'awa' aa mee cā, nī anka ke'egkee'awa' aa mee manaa.


¹¹ Adisī tcaa booweī heeu bōsega', boyō Warangee-ba'oo-bōga'. ¹² Nī boyō xona qhoosekhē, haaso ncomosōso Warangee-ba'oo-bōts'i ke'esisōsots'igaa ladi'me. Bpaā tcūsi', shedtaniaa cimē x'oo hesodzigidadtatchea, aa mee aarets'ieē bpoona. ¹³ Boyō q'uma gkidtedte dīsēna qhoosekhēgki, haaso ncomosōso Warangee-ba'oo-bōts'i ke'ē meenats'ī'ī meenaasisōsots'igaa ladi'me. Dtanāgkimeea' aarets'i. Bpaā tcūsi' nqī itana nī'tche'ōgkimee, hia'

† 8:10 Isaya 6:9

x'weex'wedtana' nxeei', aa heso-aarets'iga' lhagka'see. ¹⁴ Boyō nwee-teedtana qhoosekhēgki, haaso ncomosōso Warangee-ba'oo-bōts'i ke'esisōsots'igaa ladi'me. Bpaa tcūsi', yoo dtaangkina aa q'umadta-magkats'ia' gkwesega, nī benegets'i sona'ō, nī dturudta nqank'owa dtidteea'. Hewekhegaa heso-dturudtadta x'a'sewa gkwaa mee k'ōgaa c'uniwaksi'. ¹⁵ Boyō q'uma lhaauna qhoosekhēgki, haaso ncomosōsots'igaa ladi'me, Warangee-ba'oo-bōts'i ke'ē nī dzigidadtana bpeē ncweesisōso ni'ā lhaasots'i. Heeso arangkwa'se'ā k'oa' neē ncia.

Humbaloo bpaangia nowagka

¹⁶ Ncomoso humbaloo na'sē tchaa'ī ts'uka'ewatchoo, haa biri-tchinadtanagki gkaawawatchoo. C'aangkia' gkaawawa, hia' ncomosoa koodtana' nxeei' aa bpaangki cāso. ¹⁷ Ikhiga' heeugki, swe xwaxwawaadtokhē tchia hembets'i cāts'iwai, nī bo tchia ts'uka'maadtokhēgki manats'iwai.



Humbaloo

¹⁸ Hewegkimee lhaagkwe c'eegkats'i ke'e'ōdta. Hiingo minigkoosē, Warangee hingekhegki ladi'meei gkwee. Bpaa tcūsi' hiingo minigkoosets'ē, Warangee dtedtegkweets'ei minigkoō

hewex'a'ē heweaa gka' gkooseseiāgki.”

Yesu-ioō nī hewe-nuunuukhi

¹⁹ Hewe'ga' Yesu-ioō nī hewe-nuunuukhīso cāsana' ncaḁti, bpaā ncomoso dee'ōgkimee daatchoo hewe'ō beebasisats'i.

²⁰ Yesū aa bogkwee, gkia'gka', “Habpu-ioō nī habpu-nuunuukhi dzaka neesiso, cābposagkimeea'.”

²¹ Yesū bpaā ikha bokhi'ī, gkiagka', “Tci-ioō nī tci-nuunuukhīso haaso tchiaso Warangee-bo ke'ē nī ncweesisōsoga'.”

Yesū wekē nī ts'a-mogoongoa la'dtesugkee

²² Nqe ts'ekhe, Yesū bpaā ^a mashuanaa gke hewe-x'aaisōsokhigkiaa, bpaā ikha bokhi'ī, gkiagka', “Āgkwe ziwa-paandō dtēna.” Hewe'ga' miindzoōga' baaraa.

²³ Hia' neē mashuā'īga' ni'ī', Yesū bpaā x'o. O' ziwāḁta bpaā wekē uri meea wekē, mashuāsu saa ts'a'sa baaraā qōts'i, aa ts'āḁta lha'dtesagkimeea'.

²⁴ Hewe-xaaisōso aa Yesū'ōna' ni'ī c'egkū ikha bo, “Ba'ese, ba'ese, tcheegki!”

^a **8:22 mashua.** Tcuunxowega' ts'adta were'ī malaambo mee lhak'ee. Ncomoso gkwa'anā pagka 10a x'oo. Hewets'i megkeēḁto me'waaīga' qemewa, ts'adtana' x'agkugkuwā ni'ā khwāx'a. Dtets'i teea' siē nxūkeēts'e ni'ā gitl'e meea' hic'aa, hia wekēgi' bpaā dtaangkinaa dtula'e.

Yesū bpaā haangā wekēga khats'ewats'ee nī ts'a-mogoongōgkia, gkwaa tchiaa la'dtewa. Gkwaa putl'umats'i.

²⁵ Bpaā ikha xagkats'a'ī, gkiagka', "Sī-aarets'ī hambee?" Aa ayeē nī'ā ncoō ikha' xagkats'awāgki, gkia'gka', "Heeusi'na ho, bpaā wekē nī ts'a-mogoongogki khats'e, bpakhi la'dte!"

Yesū ncemeseē malaigka khawateesea bponaee

²⁶ Hewe'ga' heso-miindzoō'īga' nī'ī Galilaya-ziwapaandō dtēts'a' nxee, Gerasi-mji-qwaats'a', Galilaya-qwaā dtēts'a'. ²⁷ Yesū hia mashuādtatcheaa x'agkii', aa ncemeseē ts'ekhegkiaa q'oogki mjī hewedtatche. Ncemeseē hewe malaigka khawateeaa nxeewats'ee. Nqe deetee gitl'e hic'awatchee, haa ts'aagkugki iewatchee, xhō miimba' lhagka'amsewats'ekhēdtaa iewa. ²⁸⁻²⁹ Ncemeseē hewe malaigka khateē deeteewanaa tl'iba'mee. Hia ikha ncwets'ii', ncomoso akhi balooe'ōga' x'weex'we, gkeea-gku'īga' hic'ā. Bpaā ikhigkisi' hia' hic'akhē qomseea, nī malaigkā khateē bpakhi qwaa ncomososets'ē'dtenaa qeeme.

Hia Yesūga cāgeei' hewe ncemeseē bpaā k'ak'asigki rōga c'āgkweē nīgā khubpua q'awe hewe'ōga, ikha bō gka', "Bikesegko, tchegkerigko obpo, habpu Yesu, Warangee Tchia C'aangkieē-Nxobpōbpo! Nqwanebposi urisi gkoo mee kha ncwese." Ikhi bo'ōts'isi' magkawa' Yesūgaa malaigka khateēts'a baaraā bo gka' dtugkwa hewedtatche.

³⁰ Yesū bpaā xagkats'aeē, gkiagka', "Habpu-xwā ho?" Bpaā ikha bo, "Tci-xwā, Gumbe Ba'eteega'."

Ikhi bo'ōts'isi', malaigka khawatee-gumbe meeaa nxeewats'ee. ³¹ Heso malaigka khawateēso aa ura' Yesūga' nqwane bpaā mee shedtani-hic'a-q'wana khe'ī.

³² Wa'dtena gkeudto-gumbe meeaa kuunts'ats'a iē baloo. Hewe'ga' heso malaigka khawateēso Yesūga' nqwane bpaā meenaakhi'īgi aa hewekhe gkeudtōdtana nxeeso. Yesū bpaā meenaakhi'ī. ³³ Aa hewe ncemeseēdtatchoaa dtū ni'ā gkeudtokhēdtana' nxeets'i'ī. Gkeudtōso aa gawādtatchoaa geengeē ziwādtana' giribe ni'ā ts'ādtana' qhoō lha'dte.

³⁴ Gkeudto-balooisōso hia' hewekhe ncwencwets'iwasēga' ca'waa', aa giribea' bokhē hewekhets'a' ncomosogkimeea' bo mjidtā nī mindadtagki. ³⁵ Ncomoso aa dtū ni'ā ncwets'isē cāsana' ni'.

Hia' Yesū'ōga' nxeei', aa haau ncemesee malaigka khawateeaa dtudtuts'eeīga' cā. Yesū'ōga' haagkits'ī ie heweeaa somasugkuwats'ēts'i ke'esagkimeea, git'ea nxeesugkuwā nī gwesegoo lhaa'waseaa. Ncomoso aa ura' ncoo. ³⁶ Haaso bōgaa ncwets'ikhe' cāsisōso, aa wa'amāsogkimeea' dte'waakhi'ī hiingo ncemeseēga bpoonaeekhe'a'.

³⁷ Ncomoso tchiaso Gerasi-qwaadta neewasisōso aa Yesūga' nqwane gka', tchegkerigkwa o'tche ura' ncoo'ōgkimee. Hewe'gaa Yesū mashaūdtanaa gke kwaasagkimeea.

³⁸ Hiingo ncemesee malaigka khawateeaa dtudtuts'eeī, bpaā Yesūts'a nqwane gka', hewegkiaakhi'a' x'aagki. Yesūsi' bpaā isi, nīgā ikha

bogkwee, ³⁹ “Kwaagko ts’aana, nigkō Warangeeaa ncuncu’waa’bpokhē ba’ewateekhē bo’waakhi’i.”

Hewe’gaa ncemeseē hik’i qwaa tchiats’a bō ma’e mjīdtaa, ba’ewateekhē Yesuaa ncuncu’waats’ekhēts’a.

Tametchu k’wawesusū nī Yairo-nxosu bpona’i’ō

⁴⁰ Yesū hia Galilaya-qwaanaa kwaā cii’, aa ncomoso-gumbe ba’eteeaa meenats’i’i’ga’ c’wakhe’ee nee’ā dara’ōgkimee.

⁴¹ O’si’ bpaa ncemeseē ts’ekheaa ma’e Yesū’ōnaa, xwā heweīā Yairo, sinagogigkimee ba’ese. Yairō bpaa Yesū’ōga gkuantumtē ura nqwanee, bpaa hewe-ts’aagku nxeei, ⁴² nxoosu maagka 12 lhak’eesusu uri k’waweteesu’ōgkimee. Nxoōsugki ts’ekhisūsu hesudtitchu nī tlaasisagkimeesa.

Nī Yesū hia iē Yairō-ts’aanaa hik’ii’, ncomoso-gumbe tchia’dtea kok’oseē x’a’see gkwaa weroots’igkia nqank’o. ⁴³ Gumbē hewedta, ncemesu gkoosusu x’ek’a dtu’ō-k’waoosusu, maagka 12sa iē k’wauwa. ^a Bpaa mgangae bponaesats’i daasē ts’ekhegki tchee.

⁴⁴ Ncemesūsu hesu saa cī Yesu nqaa’dtesa gitl’e-tiinō dtadtats’iēsa dzaats’egkwe. O’ dtidtee hesu-k’waoō x’ek’a dtuts’ēts’i saa bpona.

⁴⁵ Yesū bpaa xagkats’a, gkiagka’, “Ncemeseeaa dzaa’tche, hona?”

^a 8:43 Girikigki’i andigkoo hingekhedta q’okonaa’ gka’, *Magkaā hesu’wai tchiasa wagangax’anasa dtoo.*

Hia' ncomoso tchiasoaa x'akhee', bpaas Petroaa gkiagka', "Ba'ese, ncomoso heekhwe deegaa nĩ tchia'dtea' gkudzuma'sebpo!"

⁴⁶ Yesūsi' bpaas gkiagka', "Gkooose dzaa'tchesē, ncemesee bponaee'ōsi ke'ets'i'ōgkimee tci-sambo'īsi."

⁴⁷ Hesu ncemesūsu hisa c'ee gkwaa iē xwats'isats'i daatchui', saa ^axhe'xhe'a cia Yesū'ōsa gkudtumde. Saa Yesūgkimeesa dte'waa ncomoso tchiaso'ōsa, hotcoogkimeesa dzaats'e'ōts'i, nisā hesuaa ts'ekhenasāts'isa lhawekhe'gki.

⁴⁸ Yesū bpaas ikha bogkwee gkiagka', "Io, habpu-aarets'īgaa bponabpo. Putl'umagko hik'i."

⁴⁹ Yesū hia xookhia iē sayoi', bpaas ncemeseeaa Yairo-ts'aagkutcheaa ci, nīgā Yairōts'a ikha bo, gka', "Habpu-nxosu tlaasisā q'ooka. Meegko iē mwalimuts'i ma'sugku."

⁵⁰ Yesūsi' hia ikha ke'ei', bpaas Yairōts'a gkiagka', "Meegko ncoo, aarets'igko dtakhi nĩ habpu-nxosūsu bpoonasu."

⁵¹⁻⁵³ Hia Yairō-koo'ōga nxeei', ncomoso tchiaso o' neesisōso nxoōsugkimeea' neē hirira'īga' k'eegkwe. Yesūsi' bpaas ikha bokhi'ī, gkiagka', "Meegkwe k'ee! Hesu nxoōsu tlaasitchuu, x'osa dtakhi iē!" Ncomoso aa Yesūga' ngeenqawaa, heso ikha' manaa'ōgkimee gka' tlaasisā q'ooka. Yesū bpaas ncomosōga x'a'amsee koonā nxee'ōts'a. Bpaas tcūsi', dtakhi Petrō, Yakobō,

^a **8:47** Ncemesūsu hesu khwalhoosusu'ōgkimeesa xhe'xhe'. Ncomoso hewekhe lhak'ā ncomoso hingedtana korats'ī meenaakhi'ītchoo aa mee khwalhime'ī. C'eegko Walawi 15:25-33.

Yohanā nī nxoōsu-dtadtā nī mesūsū hesoa tl'aa'ī
nxee.

⁵⁴ Yesū bpaā nxoōsua tl'ūts'a nqaā ikha bo gka',
“Nxoobpo, gkongo'gko!” ⁵⁵ Nxoōsu-moō gkwaa
kwaats'esu, saa ts'ekhenasāts'isa haangaa nxume.
Yesū bpaā bo, aa mantcha ieesuso.

⁵⁶ Habaisōso aa ura' ayee. Yesūsi' bpaā gka',
meekhi'a' ncemeseegekimee bo hewekhe
ncwencwets'iwasekhēts'i.

